

明史紀事本末

明史紀事本末

明史紀事本末卷四十二

提督浙江學政僉事豐潤谷應泰編輯

弘治君臣

憲宗成化二十三年九月壬寅皇太子卽位詔赦天下以明年爲弘治元年妖人李孜省伏誅妖僧繼曉發原籍爲民太常卿道士趙玉芝鄧常恩謫戍邊番僧國師領占竹等悉革職斥佞豎梁芳陳喜等往孝陵司香先朝妖佞之臣放斥殆盡繼曉尋伏誅冬十月召致仕南京兵部尚書王恕爲吏部尚書初太監懷恩以直道屏居鳳陽上素知之至是召還恩言

大學士萬安諛佞王恕剛方請上去安而召恕遂有是命恕至京庶吉士鄒智往語之曰三代而下人臣不得見君所以事事苟且公宜先請見君卽時政不善者歷陳上前庶其有濟一受官職更無可見時矣恕善其言時恕負重望其居家宰銓政多釐正焉

十一月大學士萬安罷先是安結萬貴妃兄弟進奸僧繼曉以固其寵與李孜省結納表裏奸弊上在東宮稔聞其惡至是於內中得一篋皆密術也悉署曰臣安進上遣懷恩持至閣下曰是大臣所爲乎安慚汗不能出一語已而科道交章劾之遂命罷去安在

道猶夜望三台星冀復進用尋卒 禮部右侍郎

濬進所著大學衍義補擢禮部尚書先是濬以真西山大學衍義有資治道而治國平天下之事缺焉乃采經傳子史有關治國平天下者分類彙集附以己意名曰大學衍義補至是書成進之上覽之甚喜批答曰卿所纂書考據精詳論述該博有輔政治朕甚嘉之賜金幣遂進尚書仍命禮部刊行 十二月加祀先師孔子籩豆舞佾

孝宗弘治元年春正月召南京兵部尚書馬文升爲左都御史文升陛見賜大紅織金衣一襲蓋上在東

宮時素知其名故也文升感殊遇自奮勵知無不言
閏正月詔天下舉異才 二月上耕藉田畢宴羣
臣教坊以雜伎承應或出褻語文升厲色曰新天子
當知稼穡艱難豈宜以此瀆亂宸聰卽斥去時山陵
未畢而中官郭鏞請選妃以廣儲謝遷力言不可文
升主之御史以糾儀下獄文升謂卽位之初不宜輒
罪言官於是得釋時論偉之 三月上視學釋奠先
師吏部尚書王恕請加禮於孔子前特用幣改太牢
起用謫降主事張吉王純中書舍人丁璣進士敖
毓元李文祥先是五人並以言事遠謫南京吏部主

事儲瓘上言五人者既以直言徇國必不變節辱身
今皆棄之嶺海之間毒霧瘴氣與死爲伍情實可憫
乞取而寘之風紀論思之地則言論風采必有可觀
與其旋求敢諫之士不若先用已試之人上命吏部
皆起用之 少詹事楊守陳上開講勤政疏上嘉之
初開經筵講畢賜講官程敏政等茶及宴上皆呼先
生而不名 吏部尚書王恕上言正統以來每日止
一朝臣下進見不過片時聖主雖聰明豈能盡察不
過寄聰明於左右左右之人與大臣相見者不多亦
豈能盡識大臣賢否或得之毀譽之言或出於好惡

之私欲察識之真必須陛下日御便殿宣召諸大臣
詳論治道謀議政事或令其專對或閱其章奏如此
非惟可以識大臣而隨材任使亦可以啓沃聖心而
進於高明矣 馬文升條時政十五事曰選廉能以
任風憲禁摭拾以戒貪官擇人才以典刑獄申命令
以修庶務逐術士以防扇惑責成效以革奸弊擇守
令以固邦本嚴考課以示勸懲禁公罰以勵士風廣
儲積以足國用恤士人以防後患清僧道以杜遊食
敦懷柔以安四裔節費用以蘇民困足兵戎以禦外
侮上嘉納之悉施行於內節用一條云一應供應之

物陛下量減一分則民受一分之賜言尤剴切夏
四月右庶子張昇劾大學士劉吉不報先是大學士
萬安尹直旣劾罷吉附阿科道建言當超遷待以不
次之位昇遂上疏言應天之實以人才爲先人才以
輔臣爲先初科道以萬安劉吉尹直爲言安與直以
次罷遣惟吉獨存遂建言超遷科道自是無復肯言
而羣臣靡然附之李林甫之蜜口劍腹賈似道之牢
籠言路吉實合而爲一請亟遣斥以應災異以回天
心不報御史魏璋附吉劾昇遷南京工部員外六
月王恕上言禁文職奪情起用上從之冬十二月

明史紀事本末 卷四十二
四
徽州教諭周成進治安備覽謂商鞅有見於孔門立
信之說少詹事程敏政摘其狂妄置不問

二年春正月左贊善張元禎上疏言定聖志一聖敬
廣聖知勸行王道反覆萬言上嘉納之 二月御史
湯彙壽州知州劉槩下獄先是萬安劉吉尹直在政
府嘗語彙朝廷不欲開言路彙卽以其言劾之已而
安直皆免官彙與李文祥等以爲小人退則君子進
雖劉吉在不足慮也吉使客徐鵬陷御史魏璋以殊
擢使伺彙彙家壽州知州劉槩與書言夢一人牽牛
陷澤中彙手提牛角引之而上人牽牛象國姓此國

勢瀕危賴彙復安之兆也彙大喜出書示客璋以劾之謂其妖言誹謗下錦衣獄辭連庶吉士鄒智智身親三木僅餘殘喘神色自若無所曲撓議者欲處以死刑部侍郎彭韶辭疾不爲判案獲免左遷廣東石城吏目大理寺評事夏鍬上言主事李文祥庶吉士鄒智御史湯彙等皆以言獲罪實大學士劉吉誤陛下豈知劉吉之罪不減萬安尹直乎疏畱中鍬謝病歸 五月以刑部侍郎彭韶爲吏部左侍郎王恕爲尚書得韶爲貳皆不避權貴請謁路絕 六月京城及通州大雨水溢壞廬舍人多溺死詔求直言兵部

尚書馬文升上疏言正心謹始以隆繼述禁奇巧卻珍貢慎毀譽重諮詢抑外戚開言路所司議行之

三年春三月中官乞鷹坊牧馬場千頃戶部尚書李敏言場止二百餘頃餘皆民業安得奪耕種之地以爲飛走之所上從之 夏四月定預備倉 冬十一

月有星孛於天津詔大臣極言時政得失吏部侍郎彭韶言正近侍慎官爵厚根本減役錢上嘉納之禮部尚書耿裕率羣臣條時政七事上謂有防微杜漸之意左侍郎倪岳上言當今民日貧財日匱宜節儉以爲天下先又言減齋醮罷供應省營繕上俱採納

焉

四年春正月南京國子祭酒謝鐸上言修明教化六
事擇師儒以重教化之職慎科貢以清教化之原正
祀典以端教化之本廣載籍以永教化之基復會饌
以嚴教化之地均撥歷以拯教化之弊 三月御史
鄒魯誣奏刑部尚書何喬新受餽遺下獄先是喬新
每重王恕不平劉吉吉銜之會鄒魯謀陞大理寺丞
喬新薦魏紳補之吉遂嗾魯有是奏 禮部尚書耿
裕上疏禁自宮從之 秋八月吏部尚書王恕懇疏
求致仕不許恕時有建白眾議謂業已行矣恕言天

明史紀事本末 卷四十二
下事苟未得其當雖十易之不爲害若謂已行不及改則古之納諫如流豈皆未行乎恕遇事敢言有不合卽引疾求退上每溫詔畱之 九月大學士劉吉罷時上欲封張皇后弟伯爵吉言必盡封周王二太后家乃可上惡之使中官至其家勒令致仕去初吉屢被彈章仍進秩人呼爲劉綿花謂其愈彈愈起也或告吉監中老舉人爲之吉因奏舉人三次不中者不許會試至是禁除 冬十月命禮部尚書丘濬兼文淵閣大學士

五年春二月右諭德王華上疏畧曰每歲經筵不過

三四御而日講或間旬月始一行則緝熙之功母乃或間雖聖德天健自能乾乾不息而宋儒程頤所謂涵養本源薰陶德性者必接賢士大夫之時多宦官宮妾之時少後可免於一暴十寒之患上嘉納之

三月巡撫保定都御史史琳奏宦戚假供應奪民園詔罷還之夏四月大學士丘濬上疏言時政之弊大略言陛下端身以立本清心以應務謹好尚勿流於異端節財費勿至於耗國公任用勿失於偏聽禁私謁以肅內政明義理以絕奸佞慎儉德以懷永圖勤政務以弘至治庶可以回天災消物異帝王之治

可幾也因擬爲二十二條以爲朝廷抑遏奸言杜塞
希求節財用重名器之助凡萬餘言上覽奏甚悅以
爲切中時弊 太監李廣以城垣工完乞恩量加內
官俸級王恕力持不可止之 五月遣廷臣齎內帑
銀賑杭嘉湖大水 冬十月中官傳旨以通政經歷
高祿爲本司參議吏部尚書王恕侍郎周經執奏止
之 十一月停止生員吏典開納事例王恕言永樂
宣德正統間天下亦有災傷各邊亦有軍馬當時未
有開納事例糧不聞不足軍民不聞困敝近年以來
遂以此例爲長策旣以財進身豈能以廉律己欲他

日不貪財害民何由而得乎上從之

六年春正月詔考察官未及三年被黜者復其官從
大學士丘濬之言也 三月亢旱求直言吏部左侍
郎張悅上弭災五事并修德圖治二疏上嘉納之
吏部尚書王恕致仕時大學士丘濬與恕俱階太子
太保一日內宴濬以內閣位恕上恕以己冢宰不宜
居禮部尚書下頗有言會太醫院判劉文泰援例求
進事下吏部格不行文泰訐奏恕變亂選法及不當
令人作大司馬王公傳詳述畱中之疏濬謂恕賣直
沽名恕上疏自劾乃下文泰獄恕求去益力詔允之